


Di dalam ucapannya di utara Tanah Melayu, A.Sa'don Zubir, Ketua Perikatan Pemuda UMNO kononnya telah berkata bahawa UMNO harus tidak akan menghantar wakil-wakilnya ke dalam Persidangan Pemuda anjuran dari Pulau Pinang yang bakal diadakan di Kuala Lumpur pada Hari Kelepasan Easter yang akan datang. Alasan yang diberi kononnya ialah kerana Pemuda UMNO sedang sibuk dengan pekerjaan pilihanraya federal yang akan datang. Terbit daripada ucapan itu kononnya telah timbul risik-risik di dalam lingkungan Pemuda UMNO yang berasa bahawa patut mereka mesti menghantarkan perwakilan ke majlis itu. Adakah tenaga mereka itu semata-mata hanya untuk memilih wakil-wakil di persidangan negara sahaja atau pun tenaga pemuda itu hanya dijadikan alat sahaja oleh ketua-ketua mereka. Tentang pendapatan atau risik-risik ini kita tidak ikut campur kerana perkara itu hanya di antara mereka dengan pemimpinnya. Hi! Hi! – kita tertawa dan harus pula ada orang tertawa bersama-sama kita!

Mengapa? Lihat sahaja!

\* \* \*

Dato' Onn telah mengisyiharkan bahawa bahasa Melayu

itu ialah bahasa kebangsaan di Persekutuan Tanah Melayu. Keterangan Dato' Onn mempertahankan kedudukan bahasa Melayu itu telah disambut oleh sebahagian pihak dengan bergembira kerana itulah pendapat mereka sebagai salah satu cita-cita perjuangan Melayu. Cakap sahaja dalam hal mengakui bahasa itu tentulah belum boleh meyakinkan kepercayaan umum. Yang dikehendaki oleh mereka ialah kenyataan atau buktinya. Marilah kita lihat dan kita tunggu yang demikian itu dibuktikan iaitu kita berharap di dalam persidangan Majlis Federal wakil-wakil parti negara akan membuktikannya iaitu mereka tidak mau lagi bercakap bahasa Inggeris di majlis itu tetapi terus-terusan akan



# KOPI PAHIT

bercakap bahasa Melayu. Kita menunggu langkah Onn membuktikan pengakuannya!

\* \* \*

Menurut berita-berita dari Indonesia, di sana telah didatangkan sebanyak 50 buah motorkar buatan Jerman bernama Opel. Motokar yang didatangkan itu lazimnya adalah melalui pembahagian daripada pemerintah kerana barangkali menarik sangat atau lebih gemar kepada motorkar-motorkar baru maka pegawai-pegawai yang meminta untuk mendapatnya adalah seramai 2,000 orang. Rupanya pegawai-pegawai di sana lebih gemar kepada motokar baru sedang anak negeri dikatakan makin hari makin besar penderitaannya. Ini adalah patut mendapat perhatian orang kita di sini akan riwayat suatu kemerdekaan kalau-kalau ketua-ketua semata-mata mengawal maslahat mereka sahaja!

\* \* \*

Kolej Islam hampir dibuka tidak beberapa lama lagi di Kelang. *Alhamdulillāh*, kita bersyukur atas kejayaan ini. Sesudah berdirinya kolej itu maka timbul lagi satu masalah lain iaitu siapakah pengisi kolej itu? Jawapannya tentulah terpulang kepada keadaan sekolah-sekolah agama di Persekutuan Tanah Melayu. Yang demikian tentulah menghendaki ada persatuan pelajaran agama bagi sekolah-sekolah agama di Persekutuan Tanah Melayu. Dengan ini maka timbulah pula suatu masalah yang lebih besar daripada masalah kolej itu iaitu ikhtiar mengadakan persatuan pelajar di sekolah agama yang rendah itu. Siapakah yang bakal memulainya? Marilah kita sama-sama menunggu – Cemeti al-Farouk.